

01

初夏曲三首 其一

铜壶方促夜，斗柄暂南回。
稍嫌单衣重，初怜北户开。
西园花已尽，新月为谁来。

02

学阮公体三首 其二

朔风悲老骥，秋霜动鹖禽。
出门有远道，平野多层阴。
灭没驰绝塞，振迅拂华林。
不因感衰节，安能激壮心。

03

秋晚题湖城驿池上亭

秋次池上馆，林塘照南荣。
尘衣纷未解，幽思浩已盈。
风莲坠故萼，露菊含晚英。
恨为一夕客，愁听晨鸡鸣。

04

登司马错古城

将军将（实）秦师（帅），西南奠遐服。
故垒清江上，苍烟晦（昧）乔木。

登临直萧辰，周览壮前躅。
堑平陈叶满，墉高秋蔓绿。
废井抽寒菜，毁台生鲁（稻）谷。
耕人得古器，宿雨多遗镞。
楚塞郁重叠，蛮溪纷诘曲。
留此数仞基，几人伤远（送）目。

05

秋江早发

轻阴迎晓日，霞霁秋江明。
草树含远思，襟怀有馀清。
凝睇万象起，郎吟孤愤平。
渚鸿未矫翼，而我已遐征。
因思市朝人，方听晨鸡鸣。
昏昏恋衾枕，安见元气（天地）英。
纳爽耳目变，玩奇筋骨轻。
沧洲有奇趣，浩然（荡）吾将行。

06

岁夜咏怀

弥年不得意，新岁又如何。
念昔同游者，而今有几多。
以闲为自在，将寿补蹉跎。
春色无情故，幽居亦见过。

07

酬牛相公独饮偶醉寓言见示

宫漏夜丁丁，千门闭霜月。
华堂列红烛，丝管静中发。

歌眉低有思，舞体轻无骨。
主人启酖颜，酣畅浹肌发。
犹思城外客，阡陌不可越。
春意日夕深，此欢无断绝。

08

酬湖州崔郎中见寄

风筝吟秋空，不肖指爪声。
高人灵府间，律吕伴咸英。
昔年与兄游，文似马长卿。
今来寄新诗，乃类陶渊明。
磨砢老益智，吟咏闲弥精。
岂非山水乡，荡漾神机清。
渚烟蕙兰动，溪雨虹蜺生。
冯君虚上舍，待余乘兴行。

09

晚步扬子游南塘望沙尾

淮海多夏雨，晓来天始晴。
萧条长风至，千里孤云生。
卑湿久喧浊，褰开偶虚清。
客游广陵郡，晚出临江城。
郊外绿杨阴，江中沙屿明。
归帆翳尽日，去棹闻遗声。
乡国殊渺漫，羁心目悬旌。
悠然京华意，怅望怀远程。
薄暮大山上，翩翩双鸟征。

